

դեպի այն տեղը, ուր գետը թափւում է ծովը: Այստեղ սարքել էին նրանք իրանց ձկնորսութեան սապաթները, որ ամէն առաւօտ դուրս էին բերում լի անուշահամ տառեխներով:

Անգղ գետի վերին մասը կոչւում է Խոշաբ՝ քանի որ Խոշաբ կամ Անձե-
լացեաց կոչուած գաւառի միջովն է հոսում: Իսկ երբ մտնում է Յայոց-ձորը,
նա իր ամբողջ երկարութեամբ բաժանում է այդ հովիտը երկու մասերի՝ հիւ-
սիսային եւ հարաւային: Իսկ Շամիրամի առուն, հիւսիսից գալով, կտրում է
Անգղին եւ, արհեստական կամուրջի վրայից անցնելով, գնում է դեպի Ար-
տամեդ, իսկ այնտեղից՝ Վան: Այդ վերջինը աւելի օգուտ է տալիս Յայոց-ձո-
րին, քան թէ առատաջուր Անգղը: Իր հոսման ընթացքում Շամիրամի առուն
ոռոգում է շատ գիւղերի անդաստանները, արտօրայքը: Երբեմն ագուգայնե-
րի ու խողովակների միջով, երբեմն բաց առոակով հոսում է նա, իսկ երբ
խրամատների, փոսերի վրայով պետք է անցնի, այսպիսի տեղերում նրա
համար բարձր ամբարտակներ են կառուցուած, որոնց վրայով, կարծես օդի
միջից, թռչում է ջուրը, առանց նեղութիւն կրելու, առանց շեղելու իր ճանա-
պարհից: Այդ բոլորը այնքան ճարտար կերպով է կառուցուած, այնքան մե-
ծագործ է, որ եթէ հռչակաւոր Նիստեացի թագուհու գործը չհամարենք, ան-
շուշտ մեր Արտաշէս Երկրորդի գործը համարելու է, որ արհեստական
ջրանցքով այդ գետը տարաւ Արտամեդի բուրաստանները զարդարելու եւ
կոչեց այն աւանը Չարդ: Եւ իրաւ, նա մի ժամանակ Վասպուրականի զարդն
էր:

Արեւը բարձրացաւ: Այժմ շրջակայքը աւելի պայծառութեամբ էին երե-
ւում: Ասլանը խորասուզած էր, ո՛վ գիտէ, ինչ մտածութիւնների մէջ, եւ ամե-
նեւին չէր խօսում: Ես հիացած էի շրջակայ տեսարաններով, որոնք ե՛ւ ուրա-
խութիւն էին ազդում ինձ, ե՛ւ տրտմութիւն: Որքա՛ն խիտ ազգաբնակութիւն
է եղել այստեղ, որքա՛ն երջանիկ ապրելիս են եղել այստեղ մարդիկ: Իսկ
ա՛յժմ: Այժմ աւերակ, բոլորովին անմարդաբնակ գիւղերի թիւը աւելի շատ էր,
քան թէ շէն գիւղերը: Ամենուրեք հանդիպում էինք կիսակործան եկեղեցինե-
րի, ամայի վանքերի եւ լայնատարած գերեզմանատների, որոնց շուրջը մի
ժամանակ մարդիկ են բնակուել: Իսկ այժմ այդ Նոիրական վայրերը ծառա-
յում էին որպէս որջ վայրենի գազանների, կամ նրանցից չտարբերող քուրդ
աւազակների: Կարծես մի կործանիչ ձեռք անցել էր այդ հովիտով եւ բոլորը՝
ինչ որ լաւ էր, ինչ որ բարի էր՝ ոչնչացրել էր:

— Մեր Նախնիքը ծոյլ մարդիկ չեն եղել, — ասաց Ասլանը, — նրանք հոգ
են տարել երկրի շինութեան համար, եւ դրա ապացոյցը կարող է լինել այդ